

MUZÀBÌ MUKOMBWELANGANA



Ndi mfùma ku diyikiila ne mpaasàtà. Mémè kwamba... Mvwa mumulòmbe makèèlèlà awu bwà kumbiikilayè. Ki mémè kulwa kujandula ne, ndi ànu... Ditungù dijimà adi, kakùvwakù mabiikila to, ki mémè kudyàmbidila ne: “Èè, ndi ndikonka ne ncinyi cidi kaciyi cyènda bimpè? Cintu kampànda cidi... Byònsò bìdi ànu ditalala.” Ki paanyimà pàà katanci, Mwanèètù wa bakàji Wood kulwayè ne dyanza tètè dyà mabiikila. Tèlèfonè wanyi ùvwa mujime, nàнку, piikalàbi ne muntu kanà yònsò wa kunùdi ùvwa mubiikile. Tèlèfonè ùvwa ùdila, kàdi kàyì umvwika munda amu to, pa nàнку lutàtù lùvwa ku citeemeshidi. Mbacilongòlòle lwà pa dībà mwandamukùlù makèèlèlà dilòòlò awu, anyi pàmwàpa kumpàla ndambu kwà dībà adi, nènku, tèlèfonè, mabiikila adi abwela bimpè mpindyewu.

² Tudi ne disànkà dyà kwikala mu disangisha mu dindà emu. Ndi mupetè cimpumpu cibì be, cintù pa ciibidilu mpeta pàndi ngàalukila kumbèlu. Ngendela mu nējè wa mutwè ne mu cifukà, ne ndàala pambèlu butùku. Ncitungù ncyèlela meeji to pàndi kule ne mwaba ewu, kàdi paùdi ànu upita kakùnà kàka mu New Albany, ki cyònsò cidi cikukèngela kwenza, bwà kubwela mu cibandabanda eci, dībà adi mpeta cimpumpu cyà cibì. Nènku cidi... Ncyèna mumanyè to, kùdi cintu kampànda mu cibandabanda emu cidi cimbambidikilà pànshì. Nènku cidi kwinshì, ne kacyèna ànu cipetangana naanyi to nànsha kakesè.

³ Mpindyewu, tudi ne disànkà dyà kwikala mu èkèleeziyà, bu mungàmbi amu, ne kutèelejakù mpaasàtà wetù mwimpè munanga ùlambula díyì dyèndè dyà kutùlòmbela, ne kùdi Mukalenge Yesù. Ne—ne kutèeleja, byà dibungama bwà kuumvwa babèèdi búngìbu ne beena ntàtu abu, ne mùdi dyabùlù mutombòke ùsaamisha bantu bònsò.

⁴ Ki inábànza mutekète ùjuuka bwà mwanààbò wa bakàji udi paanyimà pààpa, ne mémè ndi mumanyè ne Mwanèètù wa bakàji Sauer udi kuntu kwàka ùvwa nendè. Ngàngàbukà ùvwa mumwalùje kumbèlu bwà kufwàye patùdi twakulangana apa. Kàdi's yèyè ùcidi ànu wìtabuuja ne neòndopiibwè. Ne yèyè ùdi mu kusaama kukolè, kukolè be. Màmwenàanyì, byà mwomùmwe, pèndè ne bidimu makùmi mwandamutekète patùdi twakulangana apa. Ùdi mu kusaama kubi. Ne ncyà bushùwù ne kùdi màsaamà búngì cyanààna mu ditungà dijimà. Ne pashiishe kùdi Nyumà Mwimpè mu ditungà dijimà, nwamònu's, udi wondopa mabèèdi ètù, bu twètù ànu mwà kupetakù luse kùdiYè.

⁵ Nènku mpindyewu, mùdibi ne pa muminu pàdi pànsaama, kí mpànsaama to, kàdi mpatàpìke mpùtà. Nènku ncyàkuditàcishakù bwà kuyiisha to, kàdi kwakulangana ànu neenù ndambù mu Dìyì, ne pashiishe kuditwa mu kusambidila kwà babèèdi, címvwà mulayè bwà kwenza aci. Kàdi kumpàlà mene ne kwenza cyôci eci, ndi muswè kumanyisha bwà makwàbò masangisha. Ndi . . .

⁶ Mu masangisha àànyì ntu mupetèpète ndambù wa dinkàndameena dyà . . . kí ndinkàndameena to, kàdi ànu dyùmwà dibi ndambù. Ne misangu yàbùngì, ncitu—ncitu ne bipàtukidi bwà disangisha dyànyì to, mùtù—mùtù bàna bèètù bakwàbò bààbùngì naabi mu budimi bwà bwambi, bu mùdì cisanji ne ntèlèvìziyô, ne bikàndàkàndà ne bikwàbò. Ne mu kwenza kwà nàнку, mòna's, muntu mufwànyìne kwamba ne: “Bikèngela bwà Mwanèètù Branham ikalè mwab'ewu.” Mpindyewu mbamanyishe ne nèngìikalè mu myaba yisàtù bwà lumingu elu, ànu leelù ewu, myaba mishìilèshìilàngàne yisàtù. Ùmwè mu Kentucky mwàmwa, yibìdi mu Californie, bwà yìndiku mumanyè. Nènku kakwèna cyùdiku mwà kwenza nànsa címwè pa bwalu abu, bwalu ncyèna cingà cipàtukidi cyà cimanyìke, nàнку bìdi bìcìvwija cìkolè ndambù.

⁷ Nènku, èyowà, byôbi byenzekè ne kwìkalè muntu kampànda wa pabwìpì ne Madisonville, mu Kentucky, mwab'ewu. Bàkaavwa bammanyishe ne nèngìikalè kuntwaku lumingu lushààle aku, kàdi ncìvwà mumanyè kantu nànsa kàmwè pa bwalu abu to. Kì mèmè kwalukila kumbèlu, ne—ne bôbò bàkaavwa bacimanyishe; ne mwanèètù wa balùmè uvwa mucimanyishe awu, dyèndè ng'Epplý. Anyì, ngeela meeji ne kí cìvwà dìnà dyèndè. Ne meeji mimpè ónsò, mmwakacyenzayè. Ùvwa mumbiikile ùnkoka ní tuvwakù mwà kakùtwa makàsà bwà—bwà kwìkala dibènesha ne kupeta dibènesha dyà kùdi bantu bèndèm. Kì yèyè kubìikila. Mèmè kumwambila bwà kukonkayè Mwanèètù Moore. Èè, pashiishe, kukèngelabì bwà mèmè kuumuka. Mèmè kumwambila ne bìvwa bikèngela bwà mèmè kuumuka ditùkù dìmwèdìmwè adi. Èè, Mwanèètù Moore kupangayè bwà kumanyisha ní nganyì ní nganyì. Kàdi pàabi, anyì kummanyisha mèmè, anyì kumanyisha mukàjàànyì. Pa nàнку mvwa nsanganyibwa mu Idaho, ne ànu ngàlukila, kusangana disangisha dìmònàngàne.

⁸ Pa nàнку, kí mèmè kumòna, mu cyôci aci ne, kakwèna mùshindù wà kudyànjilla kulongolwela maalu mu Louisiane bwà bintu bìdì munkaci mwà kwenzeka kaaba aka aa to. Pa nàнку, mèmè kudyàngacila dilongolola, bwà kudilongolwela masangisha àànyì nkààyaanyì, too ne pàvwà masangisha àànyì awu . . . Mèmè ntu ànu bu . . . Kaa, ncyèna mumanyè to, ngeela meeji ne ditonda dítu dìmpè bwà musùkà. Kanwènakù nweela meeji nàнку anyì? Ntu mutàmbe kwenza maalu aa ne fwèfwèfwè be. Nènku ndekela ànu muntu kanà yònsò, mwaba kanà wònsò,

ncilekela ànu ciya ku mpùùkàpùùkà. Ki mêmè kujandula ne, kacyèna ne dikwàcisha to. Paanyimà pàà ntàntà mule, udi utèèka. . .Bikèngela bwà wikaleku ne ndongolwelu kampànda bwà bwalu abu. Nènku mpindyewu ndi nteeta bwà kwikala kudyànjila kulongolola maalu.

⁹ Nènku mêmè—nènku nénye kamona Måndamù Arnold. Ndi. . .Kùdi muntu mulùmè mu Louisville emu udi mwîmpè wa dikèma, pâmvwà ngenza masangisha mùneemu emu, ne dîna dyèndè m'Mwanèètù Burgum. Nènku ùvwa ùkèba di—dilòòlò dìmwè anyì àbìdì, bwà disangisha. Nènkamònèku Teddy wendè mutekète awu, ngeela meeji, Teddy Arnold, bwà, cikondo kampànda mu lumingu elu.

¹⁰ Ne pashìishe mu disambòmbò ne mu dyàlumingu dilwalwà edi, mêmè ne mùshindù, bu Mukalenge mwà kwanyisha, ndi muswè kusanganyiibwa ku Madisonville. Bàvwa ne bambi makùmi àbìdì ne bàtaanu, makùmi àsàtu kuntwaku. Bònsò basòmbe mwaba awu, balwè bwà. . .Umwe ùvwa wa mu kilomèètà nkàmà citèèmà ne makùmi àsambòmbò, cinunu ne lukàmà ne makùmi àbìdì. Èè, kakuyi muntu nànsha umwe mwab'awu, nànkù ncivwakù to, ne kacivwa cilèmà cyànyì mêmè to, kàdi ndi ànu. . .kàdi ànu mu kuumvwa kwà bibì, anyì kulèngulula bwà kumubiikila. Nènku nènditàcishè bwà kwikala kuntwaku ku ndekeelu wa lumingu lùlwalwà elu, bu Mukalenge mwà kwanyisha.

¹¹ Pashìishe, mu matùkù àtaanu too ne ku àsambòmbò à ngondo, mêmè mu Brooklyn, mu New York. Nènku pashìishe kuumukila díbà adi, mu matùkù à ngondo dikùmi ne ànààyi, dikùmi ne àtànù, ne dikùmi ne àsambòmbò, mu Parkersburg, mu Virginie wa ku Ouest. Ndi mulongòlòle bibìdì abi ànu mààlabà dilòòlò awu ne mu dindà emu. Mpindyewu, bwà Charlotte, mu Caroline wa ku Sud, bìdì ànu pa dibèji dyà mènà apu, kàdi ncyèna mumanyè to. Pashìishe, ki diikisha dilwa's.

¹² Pashìishe tuyààya ku Côte Ouest, kùdìbo bàlongolola di—disangisha dinènè dyà mu dibàlaasa. Mpindyewu, aa ki—ki masangisha makesè à bwena à mu bilongelu bitumbùke ne bintu byà mùshindù awu abi. Edi dyà kwàka ku Côte Ouest, nedìikalè mu—mu bimenga bibìdì, disangisha dyà disanga bimenga, cyà Oakland ne cyà San Francisco.

¹³ Ne pashìishe kasumbù kajimà kàà batùmìbwe bàà ku Phoenix, bu mùdìbi ne Mwanèètù Roberts kààkwikalamù eci cidimu to, Nèngènzè bu udi wangata kaaba kèndè mu Phoenix mwàmwa, mu—mu disangisha dyà mu citùpà cijimà cyà Maricopa amu. Acì ndiditàcisha dyà cimùkù.

¹⁴ Nènku nwànsambidilaayikù bwalu ndi—ndi naadì dijinga. Ne ndi mfika ku dyùmvwà ne musangu wònsò wùdì diitabuuja dibinduluka, dyabulù ùdì ùtàngijakù cingoma cyònsò cyà mu

ifernò, mùshindù ewu, nudi numòna's, pa nàнку cibìvwija bikolè ndambù.

¹⁵ Pa nàнку, mu dindà emu, bwà kusambidila babèèdi. Ndi muswè kubala ndambù wa Dìyì dyà Cyendèlèlè dyà Nzambi, ne kwakulakù ànu mu katancì kakesè cyanààna mu Mifundu, ne pashiishe kwenza disambila bwà babèèdi. Kaa, mùshindù mene wùntù munangè kwakula bwà bwalu Bwèndè's wè! Kàdi nwènu? MÈmè ntu ànu munangè kwakula bwà bwalu Bwèndè.

¹⁶ Mpindyewu ndi muswè kubala mu Bible, Bakalenge Mwibìdi nshapìtà mwi2, mvensà wa 12, citùpà cyèndè.

Ki Elishà kucimònayè, ne . . . kwelayè lubilà ne: Taatù wanyì, taatù wanyì, dikalù dyà mvità dyà Izalèlèlè, ne babàndi bàà pa tubalù twàdi.

¹⁷ Nèнку mpindyewu bwà kupàtulakù mutù wà—wà bwalu, anyì cyena—bwalu, ndi muswè kwakula pa: *Muzàbì Mukombwelangana*. Pa nàнку Mukalenge àsàkidilèku mabènesha Èndè patùdi twakula neenù mu dindà emu apa. Nèнку nwìkalààyikù mu disambidila bwètù twètù.

¹⁸ Mu cikondo eci cyà bukòokeshi bwà Izalèlèlè mu ditunga adi, Izalèlèlè ùvwa ditunga, ne divwa ditungà dyà bukolè, ne cìvwa bu cikondo cyà ditalala bwà luseke lwà búsàlaayi. Kàdi bwà lu—lusekè lwà nyumà, cìvwa cyenzè bu ci—cikondo cyà—cyà ditentula. Nèнку twètù batàpe dísù mu Dipungila Dikùlukùlu, tudi misangu yònsò ànu mwà kupeta bileejilu byà bidì munkaci mwà kwenzeka leelù ewu ebi. Misangu yònsò, mu Bible, bintu bidìku mpindyewu ebi, bidì ànu mubidì wà bìvwàku ku cibangidilu.

¹⁹ Mpindyewu, Mukàndà wà Genèsè wùdi wùpàtula byònsò bidì pa buloba leelù ewu ebi. Kakwèna cintu nànsha cimwè pa buloba cìvwà kacìyì cibangè mu Genèsè nànsha, bwalu yèyè ki cibangidilu. Mwòmò amu, mmwàkabangà kasùmbù ne kasùmbù kònsò. Mu Genèsè, mmwàkabangà byònsò byàkabangà abi. Ne Èkèleeziyà mulelèlè wàkabanga mu Genèsè. Ne mwena kwitabuuja wa mashimi wàkabangila mu Genèsè. Ne dibenga kucyùka dyà maalu dyàkabangila mu Genèsè. Genèsè nguvwa cibangidilu.

²⁰ Nèнку mpindyewu mu bukòokeshi bwà Eliyà, anyì lwèndu lwà bwenyi lwà Eliyà pa buloba apa, yèyè nguvwa mupròfetà wa Nzambi bwà dìbà adi.

²¹ Ne Nzambi kacya kàtukù muDìshàadile pa buloba kàyipù ne ntèmù nànsha. Nzambi ùtu misangu yònsò, mu mwaba kampànda, kaaba kampànda, ùvwa ànu ne muntu udiYè mwà kutèeka byanza Byèndè ne mufwànyine kushààla ntèmù. Nàнку pìikalàbi ne Wàkenza nàнку, kacya ku Genèsè, ku cibangidilu aku, cyà bushùwà, mu mwaba kampànda, Nzambi udi ne muntu udiYè mwà kutèeka cyanza Cyèndè mpindyewu. Bwalu

Yèyè—Yèyè's ne bantu bapite pa umwe mpindyewu, Ûdi ne bantu bààbûngi bàdiYè mwà kutèeka cyanza Cyèndè, bwalu tudi twenda tupweka batàngile ku ci—cikondo cyà didisanga, cikondo cyà dinowa.

²² Genèsè ùwva ndikùnà dyà mamiinu, nènku bidimu binunu bisambòmbò ebi bivwa diboba dyà dinowa. Nènku mpindyewu dimiinu dyàlu dimiinu dyôdi diinè. Ndyumùkile ku disampila, ne kuumukila ku disampila too ne—too ne ku mamuma. Nènku ncikondo cyà didisanga mpindyewu, cikondo cyà dinowa, dyà bintu binène byònsò byàkabanga abi. Èkèleeziyà mulelèlà wàkabanga mu Genèsè awu wàfiki ku cikondo cyà mamuma, mamuma à Nyumà. Ne mufwilàkanyi ne Kilistò wàkabanga mu Genèsè awu wàfiki ku èndè mamuma. Nènku tudi ànu mu cikondo cyà dyoya cyà cipungu cyà buloba bujimà, kùdi... cyà muntu wa cifwàkà. Nènku tudi... Ncikondo citàmbe bunène citù muntu kanà yònsò ewu, anyi nî nganyì mu cikondo kanà cyònsò eci, kacya kàyikù mwanji kupicila to, ng'eci cikondo. Ncikondo cyà dinyùkushiibwa. Ncikondo cyà ndululu bwà bangènzàmpèkààtù, kàdi ncikondo cyà butùmbi bwà beena Kilistò, bwalu tudi bamanye ne tudi—tudi tukùta, anyi tuungwija pàmwè tuumakàndà tukesè twà ndekeelu, bwà kwalukila Kumbèlu ne katwilàngana ne Mukalenge.

²³ Bantu mpindyewu, leelù ewu, panùdi nukènzakana ne numòna ndululu minènè ne dikèngà bikungamangana ne ditunga, mwaba wùdi... Kùkaadi ndambù wa malòdò, mvwà ngaakula ne muntu kampànda, uvwa umwe wa ku beena mudimu batàbaleedi bàdi batàngilà aba, ki kwambayè ne: “Mwanèètù Branham, mbafùme ku ditùtùmina díyi kùdi bukalenge bwà katwìkadikù tudimwija kàbìdi bantu bwà kulààdila panshi pabwìpì ne... kule ne dididiishi panshi, bu bòmbè mwà kudikùma, anyi kubènga kubwela mu nzùbu wa mwìnshi mwà buloba, bwalu bòmbè bupyabùpyà bùdìbo bafwànyìne kuludikila ku bisanji kuumukila ku Moscou too ne Mùsèèsù Mwinaayi mu Louiseville ebu, ne bùdikùma buludì mu mùsèèsù, bàbùtuuta, bùlenga cìdi cibùludikil-... ne bintu munda, tupànzà twà tutaayika, ne bukalenga binunu bùngi *kampànda*, binunu bùngi *kampànda*, buludikila ku mitòòto ne tulòndò twà mpolondo, ne bàbùmacishila ànu mu Mùsèèsù Mwinâyi menemene mu Louiseville, buumùkile ku Moscou, mu Russie, ne bu bwòbù mwà kutuutamù, kabyèna bikèngela bwà kukwàta mudimu ne ndèkè anyi ne cinyi to, bàbùshiyà lukàsà *apa*, ne bwòbù nebùkamacilè *pààpa*, ne nebùtaayishè ciinà mu buloba, bwà katùpà kàà buloba kampànda, mu bwondòkè bwà mètres makùmi àtaanu ne àsàtù bùya mu nseke yònsò mu ntàntà wa kilòmèètà makùmi àbìdi ne yìnaayi, kilòmèètà makùmi àbìdi ne yìnaayi mu nseke yònsò.” Kakwèna cikwàbò cyà dyenza to ànu kudìlongolola bwà kubùuka kuya muulu, ki cintu cimwèpelè cyà dyenza pààlwà bikondo abi.

24 Anji elààyìbì meeji, bàdi mwà kubitùma makùmi àtanu majimà, anyi lukàmà lujimà, musangu wùmwè, bôbò baswè kubitùma. Byônsò nebùikalè bijikè, mu katancì kàà. . . ngeela meeji ne mmu tusunsa makùmi àsambòmbò anyi makùmi mwandamukùlù, anyi cintu kampànda, anyi tusùnsukilà twà tusunsa—tusùnsukilà twà tunsunsa, èyowà's, kuumukila apu nànkù ne apa, cintu cyônsò nkòòng cìbùtuka bütùbütù. Kí nkufwànyìnekù kushààla kantu nànsha kàmwè pankaci pàa Louiseville ne Henryville, ne pankaci pàa Louiseville ne—ne Bardstown, anyi lwà muntwamu to, ànu ciinà mu buloba ne mushikì wa lupwishi lushààlemù. Ki cyônsò cidì cifwànyìne kushààla, pa kuumusha bitùpà byà malaba bìdìbu bufwànyìne kupàtukila, ne kwosha too ne mu ntàntà yà kilòmèètà ne kilòmèètà ne kilòmèètà dyàmwàmwà dyà cyòci aci. Ne pàdi bùmwe munkaci mwà kumata kwàka apu, bukwàbò bùdi bùmata lwà mu mwaba kampànda, bwà kutwilangana naabù.

25 Ndi ne disànkà dyàbùngidì mutùdì ne Cisokomenu. “Dìnà dyà Mukalenge didi Cibùmbà cicolè, baakànè bàdi bànyeemenaMù ne bàdisangana mu dikùbiibwa.” Bômbè nànsha yôyi búngì munyi anyi búngì munyi bwà bintu bikwàbò bìdì. . . Twètù tudi bakùbiibweMù. Pa nànkù, buloba ne ngènzàmpèkàatù, udi kàyi ne Cisokomenu eci, anyi Mwaba wà dikùbiibwa ewu, ncikondo cyà dinyùkushiibwa. Ngeela meeji, bu nciyi mwena Kilistò to, mvwà mufwànyìne kupeta mukupa, pa kwela meeji ku cidì cifwànyìne kwenzeka pa dîbà kanà dyônsò. Kàbìdì mwikàle ne nzùbu mùle tètè ne bânà bakesè, ne bikwàbò byônsò, ncìvwakù mufwànyìne kumanya cyà dyenza to. Kàdi ndi ne disànkà be mündìku mwà kwimana mu nzùbu mwànyì ne kubàleeja Cisokomenu cidì bômbè nànsha bùmwe kabùyìkù mwà kulenga nànsha, anyi cintu cìkwàbò nànsha cìmwè, mwínshì mwà Mapwâpwà makùbi à Mukalenge Yesù. “Kí nku bukolè, kí nku ngulu to, kàdi ku Nyumà Wanyì,” mùdì Mukalenge wàmba. Nwamònu anyi? Ki dikùbiibwa dyètù ndyòdi adi.

26 Nènku ncikondo kaayipu cinène, cyà butùmbi's wè, bwà kumanya ne mpèkaatù yônsò ne disubakana ne mateeta a mwoyi ewu nebijikè àbìdì adi panshì aa. Byônsò abi nebijikè òmwè dyà ku matùkù àdi panshì aa, ne netwàlukilè Kumbèlu bwà kwikala ne Mukalenge. Mpindyewu, cidì cishààle ncikondo cyà kuyiisha Èvànjeeliyò bwà kubweja mu Cibùmbà cinène eci búngì bwônsò, bààbùngì ne mwètù pèètù mwônsò mutùdì naamù amu.

27 Ne pashìishe, patùdì tumòna citebelu cyà dileesònà dyètù leelù ewu apa, cyà Eliyà, mu bukòokeshi bwèndè, yèyè. . . anyi, lwendu lwèndè lwà bwenyi pa buloba, mòna's, ùvwa muntu munène, wa bukolè. Nzambì ùvwa ùkwàta nendè mudimu mu mìshindù yà bukolè, ne bukolè bwà kanzèkelè. Ne tudi tujandula ne mu ciinè cikondo eci, mùvwa kasùmbù kàà batentudi bàvwà

bàteeta bwà kutentula Eliyà, bàvwà bàteeta bwà kwenza bintu bimwèbimwè byàkenzà Eliyà.

²⁸ Nàнку tudi tusangana cintu cìmwècìmwè aci leelù ewu; ditentula dyà bwena Kilistò, bantu bàdi bàteeta bwà kwenza maalu bu mwena Kilistò, bàdi bàteeta kudivwiya bôbò biinè beena Kilistò. Kwéna mwà kwenza nàнку to. Bikèngela Nzambì énzè nàнку. Yèyè ki Umwèpelè Udi mwà kucyèza.

²⁹ Ki kwenzabò cilongelu kampànda, ne kucibiikilabò ne: “cilongelu cyà baprófetà.” Ki bónsò kuyabò ku cilongelu cyà baprófetà aci, ne kubàlongeshabò. Nènku ndi mwà kudifwànyikijila bayiishi bónsò bàvwà kuntwaku abu, bavwàle nkooci wa mùshindù wà mwomùmwè ne wuwva nendè Eliyà. Ndi mwà kudifwànyikijila mùvwàbò bàteeta kutentula díyi dyèndè dyà mukana, mùshindù wùvwàye wàkula. Ne—ne mùshindù wàkadileejàye, muntu yònsò ùkèba kwenza cintu cìmwècìmwè aci, bwalu Eliyà ùvwà muntu munène ùvwà Nzambì ùkwàta nendè mudimu.

³⁰ Nènku tudi tusangana cintu cìmwècìmwè aci leelù ewu. Mvwa ntèeleja diyiisha dya ku tudyòmbà, ànu àbidì àdi panshì aa. Bàkaadi ne ba-Billy Grahams mu ditunga dijimà emu, kacya ànu Billy wàlwa mu Louiseville emu. Muntu yònsò ùkèba kutentula cintu cìmwècìmwè aci, bàsaamuna nsukì pàmwè ne mùshindù wùmwèwùmwè awu, ne—ne bàvwàla cintu cìmwècìmwè aci, ne díyi dyà mukana dyà mùshindù wùmwèwùmwè awu, ne bikwàbò. Kàdi kwéna mwà kwenza nàнку to. Bikèngela ànu wikalè cyùdi aci ne cidì Nzambì mukwenze bwà wèwè kwikala aci. Ncyà bushùwà. Ne pa nàнку tudi tusangana mùshindù wùvwàbi, pàmwàpa ne, mu matùkù awu cintu cyà mwomùmwè aci cyàkenza.

³¹ Mpindyewu, Nzambì, mumòne, mudyànjile kumòna ne matùkù à Eliyà àvwà mabala, bwà ne cikondo *bule kampànda* ncìvwà cimushàadile pànu pa buloba, mùdi muntu yònsò ewu naaci, pa nàнку Ùvwà ne cyà kupetela Eliyà mumupinganyi. Nènku pààkenzàYe aci, Nzambì wàkabiikila muntu ewu. Kàvwakù ùsanganyiibwa mu sèminère kampànda to pààkamubiikilàYe apu. Ùvwà ùdima ne ditempu dyà nkàsu mu budimi, ne cikòkedi cyà ngombe, wenza mudimu awu, anyì ùcyùka mamwèndè ne tatwèndè. Ki Nzambì kumubiikila bwà kwikalayè mupinganyi wa Elishà, anyì, wa Eliyà.

³² Pàmwàpa bààbùngì bàà mu cilongelu aci bàvwà bèèla meeji ne ncyà bushùwà ne bôbò mbàvwà ne cyà kwikala bamupinganyi, bàvwà ne cyà kuvwàla mùzàbì wèndè pàvwàbi ànu ne wàjikijì naawù mudimu.

³³ Kàdi, Nzambì ngudi wenza dibiiikila. Nzambì ngudi wenza disungula. Nzambì ngudi usòbola. Nzambì ngudi utèeka mu bulongame. “Nzambì mmutèèkè mu Èkéleeziyà: bàmwè, bàpostòlò; bàmwè, baprófetà; bàmwè, balongeshi; bàmwè,

batangadiki; ne bampaasàtà.” Nzambi ngudi wenza aci, Yéyè mwinè. Twètù katwèna mwà kuvwija lusuki nànsha lùmwè lufiike anyi lutòòke to, anyi katwèna mwà kusàkidilakù kantu nànsha kàmwè ku cipidì cyètù ku didyèlela dyètù dyà meeji to. Nzambi, mu ngàsà Wendè wa kàyi mikàlù, ne ku disungula Dyèndè ne ku didyànjala-kumanya Dyèndè, ùdi ùtèeka bintu ebi mu bulongàme, nènku lukàtà lwònsò lùdi lwènda ànu mu bimpè. Ntu munangè aci’s.

³⁴ Mvwa mufwànyine kwikala muntu mutekèshiiibwe mu mabòko, mu dindà emu, bu nciyi ngiitabuuja disungula ne dibiiikila dyà Nzambi to. Bu mèmè mwà kwela meeji ne cyènzekela buloba ebu, ncishiyà ku bukolè bwà muntu, ne ku lungènyi lwà muntu, ne ku “lwà banènè bànaayi,” ne lwà maa O.N.U., ne lwà aba bàtù kacya kabàyikù nànsha bàtèèla Dîna dyà Nzambi abu, nùnkù’s ndi muntu mutekèshiiibwe mu mabòko. Kàdi ncyèna mèmè ngeeyemena abi bwà cyènzekà to.

³⁵ Ndi ntàngila mu mabèji à Mukàndà wà kale *ewu*, mùdi Nzambi muCifunde, ne byònsò nebyènzekè ànu menemene mùshindù wàkacyàmbàYè, ne aci kì cyònsò cidiku. Nànku awu, cintu cimwèpelè cyà mèmè kwenza kì nkuditéeka mu njila wabò to, kàdi nkuditéeka mu njila wa Kàlvariyo. Ditéèkè mu njila wa Nzambi, diteèkè mu njila wa Díyi Dyèndè, shààla mu Díyi Dyèndè. Nànsha byòbì bimwèka ne nebiikalè mùshindù *awu*; nebiikalè mùshindù wùdi Nzambi mujingè bwà kwikalabi awu. Kacyèna mwà kwikala cingà cintu to. Bwalu, bu mùdiYe kàyi ne mikàlù, ùvwa mumanyè ndekeelu kacya ànu ku cibangidilu, ne Údi wèza bwà bintu byònsò byènzekè bwà butumbi Bwèndè. Ncyà bushùwà.

³⁶ “Bintu byònsò nebiikalè ne cyà kukwàcishangana.” Nebikengelè bwà cintu cyònsò kwangataci mmwènekèlu wa cikafika too ne ku kaaba kàaci. Ekèlekè! Aci bu ne kì ncifwànyinekù kukolesha mwena Kilistò ku mwoyi’s! Cintu nànsha cimwè kacyèna mwà kwenda bibi to. Twamb’eku twamb’eku, mvità kì nyètù twètù to; n’Yèndè Yéyè. Kì ndungènyi lwètù twètù to; ndwèndè Yéyè. Cintu cimwèpelè civwà cikèngela bwà twètù kwenza nkutèekamù diitabuuja dyètù ne dyeyemena, ne kusòmba bapùwe bwà kumòna butumbi bwà Nzambi, kumòna mùdiCi cinyùnguluka too ne ku mwaba wàCì, ne lukàtà lwònsò lùnyùnguluka. Cidi mwà kutangalajiibwa ku luseke ne ku luseke, kàdi neCibwelè buludì mu mwaba wàCì menemene pàdi Nzambi wàkula Díyi.

³⁷ Yéyè ùvwa mumanyè ndekeelu kacya ànu ku cibangidilu. Ùvwa mumanyè ne yéyè nguvwa ne cyà kusungula. Ùvwa mumanyè ne Elishà ùvwa mwà kwangata kaaba kàà Eliyà, kumpàlà mene kwà dyulu ne buloba kwenjiibwabì. Bikèngela bwà bintu byònsò kwenzekabi ànu mu mùshindù mujaalàme.

38 Kàdi tudi tutàcisha lungènyi bwà bananga bèètù, ne bikwàbò ne: “Nebàbwelèku anyi?” Mènà àbò, piikalàbi ne àvwa mafùndiibwe mu Mukàndà wà Mwoyi wà Mwànà wa mùkòòkò, kumpàlà kwà difùkà dyà dyulu ne buloba, nebàbwelè ànumù. Ki cintu cimwèpelè cidiye mwà kwenza ncyòci aci. Tudi tufila bujaadiki ne tukenkesha Bukènkè. Nzambi ngudi wenza, Yèyè udi ubàtwàdilaBù awu.

39 Mpindyewu mònaayi, mu Eliyà, dîbà adi, paanyimà pàà yèyè mumanè kumukùpila mùzàbi wèndè pambidi, ne kuwùteetayè pambidi. Mu ngaakwilù mukwàbò, Eliyà mupròfètà awu, ùvwa ne cikòwelu cyà Nzambi pa makaaya èndè awu, kupwekayè ne kucyèlayè pa Elishà, cidimè awu, bwà kumòna ní civa cifwànyine kumukùmbana. Nènku byàkakèngela bidimu dikùmi bwà kushintuluka, bwà kukùmbanayè mu cikòwelu aci.

40 Nudi bamanyè's, Nzambi ùtu misangu yònsò ànu ùtùtèeka mu ditanda ne utupempa. Mpindyewu, Yèyè kààkashintulula mùzàbi wèndè awu bwà kukùmbanawù Elishà to; Wàkatùmina Elishà díyi bwà kukùmbananganayè ne mùzàbi awu. Nènku ki cidiYe wènza leelù ewu ncyòci aci. Ùdi ùtùshintulula twètù bwà tükumbanganè ne mùzàbi awu, kî mmùzàbi awu bwà wòwò wùtükumbànè to. Misangu mikwàbò tutu tujinga kwenza bwà muzàbi wùtükumbànè, kàdi katwèna mwà kwenza nàнку to. Bidi bikèngela bwà wèwè (kulekela) kushintuludiibwa, wèwè mwinè, bwà mùzàbi awu. Mmùzàbi wà Nzambi, ne Yèyè mmuwènzè mupwàngàne. Nènku twètù tudi ne... Bikèngela Yèyè àtùbwejè mu cipaapu aci, bwà kufikisha mùzàbi awu ku ditükumbanawù.

41 Pa nàнку, katwèna mwà kwikala bapwàngàne, twètù biinè to. Tudi bamanyè ne katwèna mwà kuciikala to. Kakwèna mùshindù wa twètù kwikala nàнку to, ne, nànsha nàнку, Yèyè ngudi mwambè bwà twètù kwikala bapwàngàne. Pa nàнку, kàdi, cyàkenzàYe, Yèyè wàkatwènzela difuta dyà cibawu; Mukalenge Yesù Kilistò ne bwakànè Bwèndè. Ki kùdi bupwàngàne bùlwila; ku dibènga kutàngila cijila cyètù twètù, cyà bwalu katwèna nànsha naaci to; ne meeji ètù sungasunga, àvwa kaàyi àkèngela kwikalakù awu. Kàdi tudi biikishile kakùyi tuseku to pa mudimu mujikija wà Mukalenge Yesù. Nzambi wàkaMutùma pa buloba, ne mùvwa mmunda Mwèndè mutùdi twikishila.

42 Mònaayi, bidimu byònsò ebi, bwà ku dyètù pèètù dimanya, yèyè wàkapeta dibatiiza ànu dimwè dyà mùzàbi wàkalwà pambidi pèndè awu. Kàdi munda mwà bidimu, Nzambi wàkafwimba ngiikàdilù wa muntu awu kumufikisha mu mùshindù wa ne, paanyimà pàà dibiikila dyèndè, wàmòna mwà kukùmbanangana ne mùzàbi awu ne kwikalayè musadidi wa Mukalenge.

43 Nènku dîbà adi pààkopicilà Eliyà mwaba awu ne kumwelayèwu pambidi, ne kubàndabò batàngile ku Gilègàlà

ne ku yàbúngì yà ku mikwàbò myaba yàkayàbo ayi, ku cilongelu cyà baprófetà, mu njila bènda bàya, batungùmúke ne lwendu. Nènku, ndekeelu wa byònsò, Eliyà ùvwa ùteeta bwà kufikisha Elishà ku dyalukila. Nukààvwakù bamòne aci anyi? Ùteeta bwà kumufikisha ku dyalukila. Kwambayè ne: “Ndi...” Mu mùshindù mukwàbò ne: “Pàmwàpa njila mmutàmbe kwikala ndambù ne tukùnà be bwèbè wèwè, mwanàànyì wa balùme. Pàmwàpa mmutàmbe kubùlakana ndambù bwà wèwè kwendelamù.”

⁴⁴ Nudi bamanyè's, mwaba wùvwà Eliyà ùsanganyibwa awu, wùvwà mubùlàkàne. Ne mwaba wònsò wùdi musadidi mulelèlè wa Nzambì ùyiisha Èvànjeeliyò, ng'Èvànjeeliyò wa njila mubùlàkàne, kàyì musopakajakù to mwaba wùdiYè wùyiishiibwa awu.

⁴⁵ Mòna's, dínghà ditùkù, kuyayè kuntwaku ku cilongelu cyà baprófetà, bwà kabàmwènekelakù, kàdi bààkamulòmba bwà kuumukayè. Bààkamba ne: “Mwab'ewu maalu mmatàmbe kubùlakana, bwètù twètù.”

⁴⁶ Cidi cìtùkèngelà leelù ewu ndikwàbò diyiisha dyà Èvànjeeliyò, dyà dibùlàkàne diikalà mwà kutàpulula blé ne bisòte, anyi cìmpè ne cibì. Kwenza ne cidi cyà bushùwà “ncyà bushùwù,” ne cidi cyà mafi “ncyà mafi.”

⁴⁷ Balùmýànà bònsò aba ne dilabula dyàbò, ne cyònsò cìvwàbo aci! Kutùmabò bantu bwà kupetabò cintu kampànda cyà kudyà, ki umwe wabò kulwayè ne mvinyò wa cisuku, ne kubooyayè bilòwalowa byà mpàta, è kwipikilabò ndambù wa lufù mu lwesu lwàbò lwà butèndeledi alu. Nènku, katanci aka anyi, kwelabò lubilà lukolè ne: “Lufù lùdi mu lwesu!”

⁴⁸ Kàdi Eliyà, mwikàle ne bitùpà bibìdi, ùvwa mumanyè cyà dyanza, ki kwelayè dyanza dyà bukula mu lwesu amu. Yèyè ne: “Mpindyewu túngunukààyi ànu ne kudyà.” Mu ngaakwilù mukwàbò, bóbò. . .

⁴⁹ Leelù ewui, cifwànyìkijilu, ndi mufwànyine kwela meeji ne, tudi ne ba-Méthodistes búngì cyanààna, ba-Baptistes, ba-Presbytériens, ba-Luthériens, beena Mpenta, ne bikwàbò byònsò, byònsò bisopakaja, eku ewu ùlwishangana ne mukwèndè. Ne kabyèna bitùkèngela kwimansha cintu cyònsò nkòong bwà kujikijangana naaci to. Bidi bitùkèngela dyanza dikwàbò dyà Bukula. Kulama èkèleeziyà ànu umwèumwè awu.

⁵⁰ Bukula abu's bùvwà bwà ku nzùbu wa cilongelu aci aku, cìvwà ciikale mulàmbù wà bukula wùvwà bantu balwè naawù muntwamu, ne mamuma à misòmù à dinowa àvwà mavinga ne mpelu kampànda uvwà uvwija lutete lwònsò lwà bukula lwà mwomùmwe. Nènku díbà adi pàvwà. . .

⁵¹ Bukula ebu, bu mùvwàbu bwà mwomùmwe, bùvwà cifwànyìkijilu cyà Kilistò. Bukula mmwoyi. Nènku pàdi

cifwànyikijilu cyà Kilistò, bukula abu, buvinga mùshindù wa dyàcimwè; byùmvwija ne: “Yesù Kilistò umwèumwè awu makèèlèlè, leelù, too ne kashidi.” Nènku bukula mu mulàmbù wà bukula, ne pàdìbo bèèla bukula ebu munda amu, kwela Kilistò mu lufù kwàkatwàla Mwoyi. Ki cidi citwàla dishiilangana mu mmwènekeli wetù mufwè, mu tulumbùlumbù twètù, mu makòkyanganyi ètù à cyena-ntèndeleeleu ne bikwàbò byònsò. Bu twètù ànu mwà kubwejamù Kilistò, ncifwànyine kushintulula lufù, ne ditàpuluka, kulwaci Mwoyi, bu twètù ànu mwà kucyènza.

⁵² Kùdi ba-Baptistes miliyò dikùmi ne citèema mu Àmèrikè. Kùdi ba-Méthodistes miliyò dikùmi ne yisàtù mu Àmèrikè. Kùdi ba-Luthériens miliyò dikùmi ne wùmwe mu Àmèrikè. Ne ba-Presbytériens miliyò dikùmi mu Àmèrikè. Ne ànu Nzambi nkàayendè ngudi mumanyè búngi bwà beena Kàtòlikè, bàdi batàmbe ní ndyèpi dyà ku màngumba awu. Kàdi, mu biinè byònsò abi, cidi citùkèngelà ncinyi? Dyanza dyà Bukula. Bidi bitùkèngela kutwàdila èkèleeziyà Mwoyi. Ne Kilistò ki Mwoyi mene. Yèyè wàkalwa bwà kutùtwàdila Mwoyi.

⁵³ Pa nàнку, bàvwa ne makòkyanganyi àbò, ne bilongelu byàbò, ne yàbò tèò- . . . tèòlòjì, ne bikwàbò.

⁵⁴ Ki pashiishe Eliyà kwambilayè Elishà ne: “Mbimpè bu wèwè mwà kwalukila, bwalu njila ùdi mwà kwikala mukolè ndambù.” Kàdi mulume wa Nzambi ukàadikù mukungàmàngane naaci, anyi bamukùpile mùzàbì wà bwakànè bwà Nzambi ne bukolè pa dikaaya dyèndè, kì mbipeepèle bwà yèyè kwalukila to.

⁵⁵ Pàngümvù mpaasàtà wàmba, mu dindà emu ne, wetù . . . “Bàabúngi mabàngè kuteketa mu mabòko.” Cidi citùkèngelà, mwanèètù, nkupeta bukitù! Cidi citùkèngelà nkukoleshiibwa mu mabòko, ncyà bushùwà. Mateeta àdi mwà kulwa. Kacya katùtukù bapetè mulayi wà kwikala batwibwe cisàlù cyà kubènga kulengiibwa kùdìwu to, kàdi Yèyè neàfilè ngàsà bwà kupicilamù. Mukùnà wòwò mutàmbe kutumbùka bwà kuya dyàmwàmwa, mutàmbe kwondoka bwà kupicila mwínshi mwàwù, mutàmbe kwalabala bwà kuwùnyunguluka, Yèyè neàfile ngàsà bwà kupicilamù. Ncyà bushùwà. Kùtácishikù ànu meeji to, kàdi shàala mulamè mèsù pa Kilistò, bwalu Yèyè ki Umwèpelè udi mwà kutùpicishilamù.

⁵⁶ Mpindyewu, tudi tubàmòna pàdìbo bàya mu lwendu apu, bàlwa ku cilongelu aku. Ki yèyè ne: “Shàalaaku mwab’ewu mpindyewu. Ikàlà mwab’ewu, ne sòmbelà apa ne wikalè mulongeshi mwimpè wa tèòlòjì, ne bikwàbò. Nènku pàmwàpa, dimwè edi, wèwè udi mwà kulwa mukùlù wa cilongelu citumbùke kaaba aka. Kàdi bikèngela mpwekè nye kule ndambù.”

⁵⁷ Nudikù bafwànyinè kudifwànyikijila mulume wetù wa Nzambi ewu mwikalè musànkishiibwe bwà kwikala mukùlù

wa cilongelu citumbùke, pàvwà Bukolè bwà Nzambi budyādije pabwipi mene ne mwaba wùvwàye mwimànyine awu anyi? To, mukalenge. Yèyè ne: “Bu mùdi Mukalenge ne mwoyi ne musùukà wèbè ne mwoyi, mèmè ncyàkukushiyakù to.” Mèmè ntu munangè aci.

⁵⁸ Shààla naaci, nànsha ditèketa dyà mu mabòko diikàle búngi kaayi, nànsha mene cifùmina kùdi mamwèbè, tatwèbè, anyi kùdi mpaasàtà webè. Shààla Nendè Yèyè.

⁵⁹ Kuyabò too ne ku Yadènè. Kusàbukabò. Ki Eliyà kwambayè ne: “Mpindyewu, udi muswè bwà nkwenzèlè cinyi?”

⁶⁰ Yèyè ne: “Nyumà webè misangu ibìdi àlwe pambidi pàànyì.” Úvwà mumanyè ne úvwà ne mudimu wà dyenza. Yèyè ne: “Misangu ibìdi.” Kacyi ànu dilabula dimpè dyà luuyà to, kacyi ànu dilabulangana dimpè dyà ku cyanza to, anyi bwobumwè bwimpè ne bakwàbò bàà mu èkèleeziyà. Kàdi ne: “Cìndi mèmè nkèba mmisangu ibìdi yà cìdi citàmbe bwimpè aci mpindyewu.”

⁶¹ Ndi nwàmbila ne, pàdi Nzambi utèèka muntu bwà mudimu pa buloba, bikèngela yèyè ikalè ne cintu kampànda cyà citàmbe bwimpè kupita cidi naaci bàà pa buloba aci. Bikèngela ikalè ne cintu kampànda cyà citàmbe bimpè kupita cidi naaci èkèleeziyà aci. Bikèngela àkebangane ne misangu ibìdi.

⁶² Nènku kacya ní kùvwakù cikondo cidi misangu ibìdi mikègediibwa, s’n’deelù ewu, mu bipaapu byà bantu; cintu kampànda cyà citàmbe bwimpè, cintu kampànda cyà citàmbe kutumbùka. Ncyèna mwà... Ndi ngeela meeji ne nkunde ne mampà à matalà mbimpè be, kàdi mingà misangu bikèngela mfikèku mu cipidi cyà kuulu ndambù. Kàdi twètù tutu twenza nànkù; ki cidi citùkèngelà bwà kwenza. Bikèngela tütungunukè ne kubànda. Izalèelà úvwà útwa cimpingà pàvwàye ànu kacya wàshààla kaaba kàmwekàmwe aku. Bìvwa bimukèngela bwà kuyayè kumpàla anyi kwalukilayè. Nènku ki mùshindù wùdi èkèleeziyà nànkù awu.

⁶³ Pa nànkù, pàvwàbo bènda baya apu, cìvwa ànu mu tusunsa tukesè cyanààna pààkàmbàye ne: “Údi mulòmbe cintu cinène, kàdi, nànsha nànkù, wèwè mummòne pàndi nya apu, udi mwà kupeta cyùdi mulòmbe aci.”

⁶⁴ Mpindyewu, bikèngela aci cìikalè kabingilà kamwe, mwoyi wùmwe, mèsù matàngija pa cintu cìmwè, kulama dísù pa mulayi. Hum! Wèwè usaama mu dindà emu, wèwè ne lutàtù, kùdi mulayi munènè wùmwepelè; kí ngwà kùdi Eliyà to, kàdi ngwà kùdi Nzambi Yèyè mwinè. “Wèwè mwà kwitabuuja, paùdi usambila, itàbùùjà ne udi upeta cyidi ulòmba aci, nènku neucipetè.” Cidi ngàngàbukà wàmba nànsha ciikàle cinyi, nànsha *cikampànda* ciyè anyi *cikansanga* ciyè bìshi; shààla ne meeji àmwè pa mulayi.

⁶⁵ Eliyà wàkamùpa mudimu mumutùma naawù ne: “Wèwè mummòne pàndi nya apu, nebùkutùulùkilè.”

66 Kùdi mulayi ne: “Wèwè mwà kwitabuuja, bintu byònsò bìdi mwà kwenzeka bwà aba bàdi bìitabuuja.”

67 Misangu mikwàbò ntu nditàngila, ndyàmbidila ne: “Mémè’s ntu cintu citulùmùke mu nsòmbelu wanyi. Ntu mushààle mwindilèndilè, kàdi mupangè kubweja binunu byà misùkà, mu Bukalenge, mbwalu ntu ànu kacya ngìndila ngàmba ne: ‘Nzambi...’ Mutàmbe kweyemena bikolè dipà dyà nyumà. Ki mémè ne: ‘Mukalenge, bu Wèwè ànu mwà kundeejakù, bu Wèwè mwà kumpàku cikèènà-kumòna cyà mwà dyenza.’” Nènku Nzambi ùfila cikèènà-kumòna, pashiishè nkùdimuka ne ngangishila muntu kampànda untwisha bwà kwenza cingà cintu.

68 Nènku, kaa, kacya ncitukù mwanji kufika pa kaaba aku to, ànu, mpindyewu... mündi naaci patùdi twakulangana apa, ne ndi nguuvwa ne ndiitabuuja, dyà ne tudi mwà kwela cidya pambèlù pààpa, bwalu mmulayi. Ne bintu bikaadiYe mwenzè, ne dyondopa dikaadiYe mwenzè, ne bishimà abi; mu mùshindù wà ne, mmupwekè ne muDikwàcishekù neetù fòtò, ne bikwàbò, citù kacypù kaciyi cyanji kumanyiiwà kacya dyulu ne buloba byàbanga to. Ne pashiishe kwimana bu cintu citulùmùke amba’s? S’bidi bintekesha mene ne mu mabòko bwanyi mémè mwinè. Dìbà dyàkanyi dyà nwènù kulama dísu pa mulayi.

69 Nènku ki cyòci aci, ku ngàsà wa Nzambi, cìndi ndumbila bwà kwenza. Ne ndi mumanya ne démon yònsò wa mu ifernò neàcyàsè cingoma. Kàdi, ku ngàsà wa Nzambi, ndi ndumbila bwà kulama dísu pa mulayi.

70 Elishà wàkamba ne: “Bu wèwè,” anyi, Eliyà ngwàkamba ne: “Wèwè mummòne pàndi nya apu, neùpetè cyùdi ulòmba aci.” Ncyà bushùwà. Bikèngela ùlamèpu dísu; tàbaleelà mulayi. Bu mùdi, ambààiyibi yǔng bu ne bàmwè bàà mu cilongelu aci, bu yèyè mukùdimùke, mwambè ne: “È, balùmyànà, didi dyenda mmunyi mpindyewu, dilonda dyanyi dya mupròfetà paanyimà edi?” Nùnkù’s mmupangìle, pàmwàpa. Kàdi yèyè kàakacyùkaku civwà beena mu cilongelu aci bèèla meeji, anyi civwà balongeshi bònsò abu bèèla meeji to. Kàakacyùka civwà beena mutumba bèèla meeji, anyi nžubu, anyi ní nganyi uvwa umutàngila to. Wàkalama diitabuuja dyèndè mu mulayi.

71 Cìdi citùkèngelà leelù ewu ndiitabuuja mu mulayi wà Nzambi, ne katwèna tutùma ntèmà ku cìdi kampànda wàmba anyi kansanga wàmba to.

72 Bu mwàkamba mwanèètù wa balùmè kampànda, mwambi kampànda ùvwa ne bàna bàà bakàji bàbidi bàvwà tumàmà, ne didyula dyà dyondopa dyà kùdi Nzambi, ne: “Bàna abu kabàvwakù mwà kwondopiibwa to.”

73 Kucyùkukù badyudi to. Lamà diitabuuja dyèbè pa mulayi. Nzambi ngudi mwambè nànkù! “Disambila dyà diitabuuja

nedisungilè mubèèdi, ne Nzambì neàmujuuulè panshì.” Pìikalàbì ne Yèyè ùdi mwà kufikisha mpudimaci-kamàmà umwèpelè ku dyumvwa, Yèyè’s ùdi mwà kufikisha mukwàbò mpudimaci-kamàmà ku dyumvwa. Tudi bamanyè, ku bijaadiki bìdi kabiyi mwà kupangila ne, Yèyè ùtu wènta nànkù. Tùlamàayi diitabuuja dyètù pa mulayi. Mèsù ètù pa cintu cimwèpelè; maci ètù pa cintu cimwèpelè; myoyi yètù pa cintu cimwèpelè; nènku, cintu cimwèpelè, pa Yesù Kilstò, ne Yèyè ùdi ne bukolè bwà kwenza cidìYè mulayè. Kaa, patùdi twela meeji nànkù, cidì cishintulula cyalu cyònsò nkòong patùdi tupeta cyòci aci. Nzambì ngwàkafilà mulayi. Nzambì ng’Wàkacyàmba.

⁷⁴ Mpindyewu, mwìnyàmpalà wa Nzambì nyèyè ewu mucyàmbè, nènku mpindyewu Nzambì Yèyè mwinè ngudi mucyàmbè. Dìbà adi citùdi twètù mwà kwenza ki cinyi? Kakwèna cintu nànsha cimwè to ànu kulama meeji ètù pa cyòci aci. Yèyè wàkamba ne: “Wèwè mummòne pàndi nya apu, udi mwà kupeta mulayi awu.” Elishà wàkashààla ne mèsù malama pa Eliyà. Cìvwà cyèla mbila nseka yònsò nànsha ciikàle cinyi, cìvwà cyènzekà nseka yònsò ciikàle cinyi, cikaavwà cyènzèke kumpàla kwà aci nànsha ciikàle cinyi, kàakacitàngilakù mene to. Wàkalama mèsù pa mulayi. Ki bwalu mbwòbù abu’s, mèsù èbè pa mulayi.

⁷⁵ Ndi mvùluka inàbànzà utùvwà bakakùmbùle dilòlò adi, Mwanèètù wa bakàjì Sauer. Ne ngàngàbukà ùmwambila mùvwàye bibi be. Kàdi mèmè ncìvwakù mulondèle mukàjì awu to; mulondèle munanga wèndè to. Ne mùvwàbi bifwànyine kwikala kabiyi mwà kwenzeka bwà yèyè kumvwakù bimpè. Mpindyewu, mwanèètù, bàyenda wa mwanèndè kucìnkongkayè. Mèmè kwamba ne: “Yèyè mwà kushààla ànu mulamè mèsù pa mulayi.” Cìdi cyènzekà nànsha ciikàle cinyi, lamàayi mèsù pa mulayi.

⁷⁶ Kùkaadi ndambù wa mbingu, Mwanèètù wa bakàjì Wood ewu, ne Mwanèètù Wood, balundà bèètù bàbìdi bàà katàpùl-katèèka mu èkèleeziyà emu. Mvwa nsanganyiibwa mu Michigan ne balundà bàanyi, Leo ne Gene. Tuvwa buumùke ku disangisha dyà ku Chicago ne bayè ne bàmwè bàà ku bantu bààbò, ku. . . munda mwà matùkù àbìdi, bwà kuya kalemba tushà ne butà bwà miketa. Kàdi mu njila wanyi wa dyalukila amu, mukàjàanyi ùvwa munkwàte, ki kwambayè ne: “Sambidilàku mamwèndè wa Màndàmù Wood. Kànsêre kampànda kàdi munkaci mwà kumudyà mpàla yònsò.” Ki yèyè ne: “Kacyapù ncitukù mwanjì kumòna Mwanèètù wa bakàjì Wood mulubàkàne mùshindù wàwa to. Ùdi mu myadi’s.” Mwanèètù wa bakàjì Wood ùtu misangu yònsò ànu cilòbò cyà diitabuuja, kacya ànu Nzambì wàmwondopela mwanèndè wa balùmè ku bulèmà bwà mukòlò, ne mumwondòpe yèyè ku disaamà dyà cyàdi, ne bikwàbò. Kàdi ùkaavwa mucyòke.

77 Mu cibambalu mwàmwa, dilòlòlò adi, twètù kusambila. Ndi mwenzè ànu mbwela, Màndàmù Wood kwambayè ne: “Mwanèètù Branham, netùye kuntwaku.” Ki twètù kuya kùdì mamwëndè, uvwa usanganyibwa mu Louiseville. Nènku ùvwa ne kànsèrè ku luseke lwà dyùlù, ne ngàngàbukà ùkaavwa muteetèle eku muteetèle eku, mukàtangàlajè; mu mùshindù wa kushààle ànu kalengulengu ku luseke lwà dyùlù aku, ne kabànde ànu too bu ku millimètres yisàtù ne dísù, kushààle ànu mufùbà muntwamu. Kamanè kudìdya ne lùkàsà lwònsò mùvwàku mwà kudyà amu.

78 Mémè kubwela mu cibambalu, ne kutwà binù. Mémè kwamba ne: “Ndi muswè kwakula nendè yèyè nkààyendè.” Ki mémè kubwela mu cibambalu amu bwà kusambila ne mukàjì awu. Nènku pàncivwà mu cibambalu amu apu, mémè kudyàmbidila ne: “Éyì Nzambì, bu Wèwè mwà kundeejakù ànu cìkèèna-kumòna cyà cìikalà mwà kwenzekela mukàjì ewu’s.” Mukalenge ne Màndàmù Wood basòmbe pambèlu apu, bindile bwà kumòna civwà cìkèèna-kumòna aci cifwànyìne kwamba.

79 Kàdi pàncivwà muntwamu apu, mémè kudyùmfwà mupìshìibwe. Mwà mupìshìibwe bwà mùmwà mwìndìle cìkèèna-kumòna. Kumwèkabi bu ne Cintu kampànda civwà cingaaluja paanyimà ne: “Aci kí ncivwà dibìikila to. Cyùdì ukèngela cìkèèna-kumòna ncinyì, pàdì mulayì mumanè kwambibwa?” Ki mémè kutwà binù è kusambila. Ne pàmvwà munkaci mwà kusambila apu, cintu kampànda kwelaci ànu lwongò munda emu, diitabuuja dyà mulayì.

80 Mémè kwalukila pambèlu apu. Ki Màndàmù Wood, pàngàakamwambilàci, kwambayè ne: “Udikù mumòne cintu kampànda anyi, Mwanèètù Branham?”

81 Mémè ne: “Ncyèna ànu mumònekù cintu kampànda menemene to, kàdi ndi muumvwè Cintu kampànda civwà cingambile ne mulayì Wèndè wùvwa mulèlèlè ne Yèyè neàcyènzè. Nènku mémè ndi ngiitabuuja ne Yèyè neàcyènzè.”

82 Nènku mèbà makumi àbìdì ne ànaayi kaàyì manjì kukùmbana to, ndekeelu wa kànsèrè aku kutwàdijayè kumwèka ne cilamùlamù kubangacipu. Tùnsèrè katùtukù twènza cilamùlamù to, munùdì bamanye amu, ambà ànu kòkò kafwè. Nànku ki cyòci aci mwab’awu mpindyewu’s. Ne mukàjì awu mmwondòpìibwe, ne ùdì kumbèlu. Kilistò wa ùkèmeshangana kaayi’s wè! Ku dilama dyà mèsù ètù pa mulayì’s! Nzambì ngudi mwambè nànku!

83 Kàdi pàdìbo bàtùsambidila, misangu mikwàbò, tudi tuumuka twamba ne: “Èè, kí ncyènzèke ànu dyàkàmwè to, pa nànku pàmwàpa bìvwa bìmpè bwà twètù kwikala baalùkile cyàkàbìdì.” Kaa, to.

84 Lamà dísù pa mulayì. Nzambì ngudi mwambè nànku, aci ncikòse bwalu. Ki cyònsò cidiku ncyòci aci. Pìikalàbi ne Nzambì

ngudi mwambè nàнку, Nzambì mmukùmbàne bwà kushààla mukwàte ku mulayi Wèndè, bwà cyanààna Yèyè kàvwaku mufwànyine kuwènza to.

⁸⁵ Abraham wàkabiikila bintu abi, bìvwà kabìyikù abi, bu ne bìvwakù. Nènku, munda mwà bidimu makùmi àbìdì ne bìtaanu, mwimàne pa bìvwà kabìyi mwà kwenzekakù abi, bwalu yèyè wàkabala ne Nzambì ùvwa ne bukolè bwà kwenza cìvwàYe mulayè. Amen. Ne twètù tudi bàna bàà Abraham, ku diitabuuya.

⁸⁶ Cyà bushùwà, Eliyà wàkashààla mulamè mèsù pa . . . anyi Elishà pa Eliyà, nènku pàvwàbo bènda bàya apu. Ki paanyimà pà katançi, dikalù dyà mvità adi kulwadi ne kubàtàpululadi, ewu ku elu luseke ne mukwàbò, ne pashìishe kwambuladi Eliyà. Pa . . . Kubàndayè mu dikalù dyà mvità adi è kuyayè muulu, ne kuvùlayè mùzàbì wèndè awu pa makaaya ne kuwùkùpilayè Elishà. Bwalu, Elishà ùkaavwa mukolèlemù, nudi bamanyè's, bwa kumukùmbanawù ànu menemene. Nènku nudikù bafwànyine kudifwànyikijila . . .

⁸⁷ Kaa, ndi muswè bwà nùmpaayi macì, bu mùndì ngumvwa muminu wùnsansakana. Ndi muswè nnùkonkèku cintu kampànda.

⁸⁸ Nudikù mwà kudifwànyikijila mwàkadyùmvwà Elishà pàakambulayè mùzàbì ewu, kuwùtèekayè pa dikaaya dyèndè sungasunga anyi? Kaa, njiyà kaayi's wè!

⁸⁹ Ncyèna nswà kwamba eci bwalu ncintàngila to, kàdi kùkaadi bidimu bitwè ku dikùmi, ku cyambilu eku, mvwa muiyishè pa diyiisha kampànda; Davìdì, mulwanganyi wa mvità mwikàle ne ndundu wa nyuunyi mu cyanza, ne Goliyààta kumpalà kwèndè. Mu miinè matùkù awu kakùvwakù tùmpanyè twà dyondopa mu budimi bwà bwambi to, mwaba nànsha wùmwè, bwa ku dyètù pèètu dimanya. Nènku, kaa, mùshindù mwinè wùvwà bantu bàdyulangana pa dyondopa dyà kùdì Nzambì's wè! Kàdi kùvwà cintu kampànda, paanyimà pàà batwilàngàne ne Kampànda. Ne bampaasàtà bàvwà bàngambila mùmvwà njìmija lungènyi, ne mùvwàbì kabìyi mwà kwiikala nàнку to. Kàdi, mwimànyina ànu ku kashèetè kàmwèkamwè aka, mèmè kwakula pa Davìdì. Yèyè ne: “Nudi baswè kungambila ne, bilwilu byà Nzambì udi ne mwoyi ebi, nebilekelè mwena Pelèshète udi kàyi mutengula wàwa wèla cilwilu eci kadyòmbò anyi?”

⁹⁰ Kànà kakesè kàà balùmè kàà kale kàà tukaaya tukòbàme, nsuki mvwàngalà kavwàle kaankooci kàà cisèba cyà mùkòòkò, kiikàle ne ndundu wa nyuunyi mu cyanza; kiikàle ne cilwilu cijimà cyà Izalèlèlè ciimàne, cicincimika. Kàdi yèyè, nkàayèndè, kupàtukayè. Ne muntu, mwikàle ne—mwikàle ne difùmà dyà bule bwà bwìpacila mètres àsàtù, ne cintu cìvwà ku lusongo lwàdì cìvwà ne bujitu bwà nshèkelè bùngì cyanààna, pàmwàpa cyàmù cyà bujitu bwà kilò citèemà, cisongòlòke, difùmà dyà

bule bwà bwìpacila mètres àsàtù, mwikàle ne minu yà bule bwà centimètres makùmi àsàtù ne yisambòmbò.

Ne pàmwāpa Davidi ùvwà ne bujitu bwà kilò makùmi ànaayi, kàdi kwimanayè, ùzùnzuka, byenze bu kazòòlò kàà citààlà kàà kapengapenga's, ki yèyè ne: "Nudi baswè kungambila ne," kaa, ekèlekèle, "ne nenùlekelè mwena Pelèshètè udi kàyi mutengula ewu! Yèyè ùshààle pa kaaba kèndè, mulekèlaayi àsombè, kàdi's nyawù wèla bilwilu byà Nzambi udi ne mwoyi kadyòmbò." Kaa, ekèlekèle, ncilòbò kaayi's wè! "kàdi nwènú bònsò nudi ne bwòwà bwà kucilwisha?" Yèyè ne: "Ndekèlàayi mémè ngàakamanganè nendè." Kaa, ekèlekèle! Yèyè ne: "Nzambi wa mu Dyulu kwenzayè bwà nshipè nyama wa ntambwe ne ndundu wa nyuunyi, kwenzàYè bwà nshipè ours ne ndundu wa nyuunyi, kadi ambàayi tũng mwàpangilàYe kumpà mu byanza mwena Pelèshètè udi kàyi mutengula wàwà!" Ncyà bushùwà.

⁹¹ Nènku pààkangaciibwà bucìmunyi bwà nzànzànzà abu, ne Goliyààtà mutònkòdiibwe, bilwilu byònsò byà Izalèèlà kutwàbi Davidi mu nyimà. Ki kubàkòsabò mitù kwendabò naabò kadyàbàta, beena Izalèèlà abu...anyi kwendabò kadyàbàta ne beena Pelèshètè abu mu buloba bwàbò sungasunga amu. Kubàncìncimikilabò mu matumba, kàdi kubàshebeyabò, ne kwangatabò bimenga byàbò, ne bikwàbò byònsò, ne kucìmunabò.

⁹² Mwanèètù wa balùmè ne wa bakàji, bwalu bwà mwomùmwè abu's bùkaadi bwenzèkè mu bipaapu byà citàmbe-mfùkilu, pààkambàbo ne: "Dyondopa dyà kùdi Nzambi kadyèna mwà kukùmbana to. Matùkù à bishimà àkaadi mapite." Piikalà matùkù à bishimà àkaadi mapite, matùkù à Nzambi's àkaadi mapite. Èkèleeziyà udi kàyi witabuuja citàmbe-mfùkilu ndekeelu wa byònsò neáfwe, ne Nzambi neàpatukè mu èkèleeziyà awu. Ùdi ne cyà kupàtukamù! Kàdi Nzambi ngwàkafila mulayi, ne milayi yà Nzambi nyàà Cyendèlèlè.

⁹³ Kùdi cikondo kampànda mwab'ewu pàvwà nsongààkàji kampànda yinàya ne radium, bàvwa bàtwamu, ne balaaba radium pa milonda yà mèbà. Ndi nende pa edi nunku. Kàdi nsongààkàji kampànda kutùpakanayè è kwangatayè bùloosò è kubwèlayè mukana. Kumushipabù's. Nènku bidimu ne bidimu bimanè kupita, kwangatabò microscope ne kuyitèeka pa kabalùbalù kàà nsongààkàji awu, ne bàcivwa ànu mwà kutùngunuka ne kuumvwa radium awu mutùngùnùke ànu ne kwenza ne: "Brrr-brrr-brrr." Ncyà kaciyi ndekeelu to. Cìcidi ànu citùngùnùke ne kukwàta mudimu, ànu nàнку ànu nàнку. Kacyèna cìmana to.

⁹⁴ Nènku, kaa, mwanèètù, piikalà radium ne bwenzeji bwà mùshindù awu mu twètù, ambàyaaku tũng bwà Nzambi udi kàyi ne ndekeelu, wa Cyendèlèlè, mutàmbe-mfùkilu, wa ngulu

yònsò, udi kàyi ne mikàlù, wa Bukolè bwònsò awu! S' bikèngela Yèyè ikalè ne bwenzeji bùmwebùmwe mwàkabangàYe amu. Bikèngela Yèyè ikalè naabù too ne ku ndekeelu, bwà cyanààna Yèyè kèna Nzambì wa Bukolè bwònsò, wa ngulu yònsò to. Yèyè ùcidi ànu mwindile bwà muntu kampànda mwikàle ne diitabuuja dyà dipàyame, wíkala mwà kupàtuka ne kwela mwena lukunà kadyòmbò mwimànyine pa Dìyì Dyèndè wàmba ne Dìdì nàнку.

⁹⁵ Nènku mpindyewu cyàkenzekà ncinyì, ànu pààkabangà kàmpanyè kanène kàà dyondapa aku? Dìbà adi binunu byà mäsàlaayi, byà balùmè bàà Nzambì, bìvwà bishaala paanyimà mu èkèleeziyà yà mikèsè ayi, bu mùdì Oral Roberts, Tommy Hicks, ne bààbùngì bàà ku bantu bakwàbò bàà batàmbe kumanyika mu budimi bwà bwambi, kutùulabò Mwelè wàbò wà mvità ne kuyabò. *Ewu* Mwelè wà mvità wùdì wùkòsa ne mu diya ne mu dipingana ewu, mu dibànda ne mu dipweka, ne mu dibwela ne mu dipàtuka, “Dijinguludì dyà meeji, dibwela too ne mu bwòngù bwà mifùbà.” Kukòkabò Bibles yàbò, Mwelè wàbò wà mvità, ne kupàtukabò, pààkamònàbo ne bìvwà mwà kwenjiibwa. Nènku tudì bapè mwena lukuna mutuutu, ku ngàsà wa Nzambì, too ne mwàkapetà buloba bujimà ditàbuluja dyà dyondopa. S' bìdì mwà kwenjiibwa. Bampaasàtà bàà bakesè bàvwà ne tuuèkèleeziyà tukesè, ne bikwàbò, kulàkukabò kapyà è kumònabò cikèèna-kumòna aci, kulòpolabò Mwelè wàbò wà mvità ne kupàtukabò, kwelabò mwena lukunà kadyòmbò.

⁹⁶ Wàmanyi munyì ne cìdikù? Kùdì bantu banène, Congressiste Upshaw, Mfùmù George wa mu Angleterre, ne bantu banène bààbùngì bàvwà balàale panshi babèèdì ne batàcishiibwe, mbondòpiibwe ku Bukolè bwà Nzambì wa Bukolè bwònsò. Pa nàнку kabèèna mwà kwamba cintu nànsha cìmwè pa bwalu abu mpindyewu to. Mbyenjiibwe. Cyà bushùwà! Yèyè ùvwà . . .

⁹⁷ Pashiishe Eliyà kuyayè. Paanyimà pàà . . . Dijinga dyà mwoyi Wèndè wònsò nkòòng dìvwà dyà kupeta mulayi awu. Cìvwàye ùkèba mmulayi awu. Ki cìvwà tubingilà twèndè. Ki cìvwà cyèndè cyònsò. Ki cìvwà mwoyi wèndè. Ki cìvwà dipàngadika dyèndè, byònsò. Byònsò, bintu byònsò, bìvwà biswikila ku dipeta dyà mulayi awu.

⁹⁸ Mémè ndi mutwishiiibwe bwà kwitabuuja ne katwèna ne meeji matòoke pa bwalu butùdì twamba ebu to. Kabingilà kèèbè kònsò, mu dindà emu, kòkò katèèkela pa ne: “Ndi ntumbisha Nzambì bwà dyondopiibwa dyànyì. Ndi mupàngàdike bwà kwondopiibwa ku Bukolè bwà Nzambì. Ndi mupàngàdike bwà kwikala ne nsòmbelu wa bwena Kilistò. Ndi mupàngàdike bwà kwenda mu ditalala ne Nzambì. Ndi mupàngàdike bwà kucyènta. Cidì mààmù wàmba nànsha ciikàle cinyì, cidì èkèleeziyà wàmba, cidì mpaasàtà wàmba, cidì ní nganyi mukwàbò wàmba, cidì bàà pa buloba bàmba. Ndi mupàngàdike.

Ki cyònsò cìdì mu mwoyi wànyì.” Dìbà adi neùkafikè ku mwaba kampànda.

⁹⁹ Pashiishe, pààkamònà Elishà ne yèyè ùvwa mupàngådike bwà kuwùpeta, Eliyà wàkamòna ne *Elishà* ùvwa mupàngådike, kumupèeshayè mulayi awu. Mpindyewu, mulayi wùvwa ne: “Bu wèwè mwà kummòna pândì nya apu! Bu wèwè mwà kummòna pândì nguumuka apu!” Mpindyewu aci ncitàngile Elishà. Ùvwa muswè kuumvwa mulayi, ki kupetayè mulayi awu. Mpindyewu mùdì “bu” munda amu. “Bu wèwè mwà kummòna pândì nya apu!”

¹⁰⁰ Mpindyewu, wèwè usaama mu dindà emu, ne muswè kwondopiibwa, ndi mwà kukujaadikila ne Kilstò wàkakupà mulayi. Mulayi ngwèbè wèwè ne: “Bu wèwè mwà kwitabuuja! Bu wèwè mwà kwitabuuja!” Kucimunyibukù to.

¹⁰¹ Mpindyewu Elishà kudijingilayè mu mùzàbì wà Eliyà, mupròfetà awu. Lwendu kaayi lwà mucimunyi's wè! Mùshindù mwìnè wàkendaye, ùdyata lwendu mutàngile ku Dyulu, bu mucimunyi's wè! Yèyè ùvwa muumvwè mulayi. Ùvwa muumvwè bukolè abu. Ùvwa wènda bu mulwanganyi wa mvità, ùpweka mutàngile ku Yadènè.

¹⁰² Butùmbì kùdi Nzambi's, mulundà wanyì! Mwena kwitabuuja yònsò, mu dindà emu, udi muvwàle mùzàbì wà bwakànè bwà Kilstò, ùdi wènda mutàngile ku njila wa Yadènè. Ncyà bushùwà.

¹⁰³ Bómbe yà mushindà yilwe; bùlwe, mwàlwàbu mwònsò amu. Twètù tudi bavwàle mùzàbì ne munkaci mwà kwenda, mucimunyi awu. Amen. Ndi... “Kuciinyi to. Ngaacimunu buloba.” Eyowà's, mukalenge! Vulukàayi cinyi? “Ngaacimunu buloba.” Kilstò ngudi mwambè nànkù.

¹⁰⁴ Eliyà ùvwa wènda muvwàle mùzàbì mumukombwela, ànu bu mucimunyi, mu mùshindù mwìmpè menemene, ùlwa mutàngile ku Yadènè.

¹⁰⁵ Mwanèètù, lekèlè ngǎmbè eci ne kaneemu kùdì. Kùvwàdikù mùzàbì wà muntu mukwàbò wùdì mudyà wònsò kùdì mbùmbà wa mpatà to, mùdì macimunyiibwa ónsò ne diitabuuja dyà biitabàatàbà ne mabika ne mala bitùbùlètùbùlemù masòsò, ne bìzòloloka byònsò màyi zònzàzònzèè. Vwàla wèwè mùzàbì wà Mucimunyi awu, Kilstò. Kwèyemenyi èkèleeziyà webè wàkalongesha musangu kampànda lupàndu ku dibàtiiza dyà Nyumà Mwìmpè awu, wàkalongesha musangu kampànda dyondopa dyà kùdi Nzambi kàdi udi uDivila mpindyewu ewu awu, yònsò mudyà kùdì mbùmbà yà mpatà ne bikwàbò byònsò. Vwàla mùzàbì wà Ewu utu kacya kàyikù mwanjì kupangila mvità awu to, bwalu udi mu njila mutàngile ku Yadènè. Amen.

¹⁰⁶ Mpindyewu, yèyè ùvwa muvwàle mùzàbì mumukombwela, ncyà bushùwà. Ne bantu bààbùngì mu dindà emu mbavwàle

mizàbì mibàkombwela. Kàdi pààkafikàye ku Yadènè, wàkajingulula ne mùzàbì awu nkààyaawù kawùvwa mufwànyine kukùmbana to. Ncyà bushùwà. Nènku èkèleeziyà, ba-Méthodistes, ba-Baptistes, beena Mpenta, ba-Presbytériens bóbò ne: “Kaa, twètù’s tudi ne bilongelu! Bwà... Èkèlekèle, twètù’s tudi ne nsòmbelu wa bùkàlàngà yònsò, wa Bible, bishikuluja bilenga bilayà. Tudi ne mizàbì yònsò yà miluka bimpè ayi, milayi. Tudi naabi byònsò. Kaa, tudi babàtìiibwe, batwinyija too ne panshi. Ne twètù tudi bàà cìpostòlò bàà dikèma. Tudi ne diitabuujà dyà bàpostòlò. Tudi twiitabuujà dyondopa dyà kùdi Nzambì. Tudi twiitabuujà Nzambì. Tudi twiitabuujà Makolè à Nzambì. Tudi babàtìize, mu Bible, mùdi Bible wàmba amu. Tudi bapetè Nyumà Mwimpè. Tudi baakùle mu myakulu. Tudi twenza byònsò abi.” Kàdi, mwanètù, piikalàbi ne aci ki cintu cìmwèpelè cìdi cikukèngela, neùjandulè dipangila dyèbè, wèwè pèèbè, pawàfikà ku Yadènè.

¹⁰⁷ Kaa, udi mwà kwikala mulongèshìibwè. Udi mwà kwikala ne meeji matwè. Udi mwà kwikala ne dyà D.D., Docteur mu Bunzambì. Udi mwà kwikala ne dipòlomè dyà Ph.D., Docteur mu Lwidi. Udi mwà kwikala ne dyà LL.D., Docteur mu Latin. Udi mwà kwikala ne màpòlomè à mìshindù yònsò. Udi mwà kwikala muvwàle mùzàbì wà èkèleeziyà wa ba-Méthodistes. Udi mwà kwikala muvwàle mùzàbì wà èkèleeziyà wa beena Mpenta. Udi mwà kwikala muvwàle mùzàbì wà beena Assemblées, anyi wà ba-Unitaires, anyi wà ba-Trinitaires, anyi cyònsò cìdici cìfwànyine kwikala aci. Cìdi ànu mmùzàbì mukukombwela’s, twamb’eku twamb’eku, ncyà bushùwà, wa mèyì kampànda maswika makwàtakaja kùdi bantu, madyelela meeji, ne bikwàbò byà mùshindù awu; ne nànsha byòbì ne wèwè ukàadi mwena Kilistò, ne èkèleeziyà ùkaadi wa beena Kilistò, ne muvwàdika mùzàbì bimpè menemene.

¹⁰⁸ Kàdi Elishà, pààkiimanàye, ùkòka ntèmà, ku mwelelu wà musulù mùle tètè ne bapròfetà ne badyudi, bwà kumòna cìvwàye mufwànyine kwenza, kàdi ki yèyè ulwàlwa ewu, wènda muvwàle mùzàbì wà Eliyà, kaa, èkèlekèle, àlèluuyàh, mbwena kwamba ne mmùlongesha kàlaasà, mmulongèshìibwè tulaasà, mmukòòkela, mmwitàbùùjè, kàyì ne bwalu bubì to, nyàwù wènda ùpweka mutàngile ku Yadènè, bàà pa buloba bàmutàngila.

¹⁰⁹ Éyi Nzambì, mùshindù mwinè wutùdi tubikèngela leelù ewu’s wè! Ne bamanyi bàà mabàlà bààbùngì balongesha ne balongè tulaasà; ne bantu bààbùngì bàdi mwà kusùsulula Bible awu kàdi kuMutwangaja pàmwè, mu dyanza dyà makumi; bantu bààbùngì bàdi mwà kwenza bintu binène mu mishindù yà dilongesha; bàdi bamanyè bwalu-bulonda bwà Bible pa dībà mene, bàdi mwà kukwambila dībà dyàkateemeshiibwà kàndeyi, ne dībà dyàkajimàku. Bàdi mwà kukwambila bintu byònsò ebi. Ne bàdi . . . Bàdi ne dibàtiiza dyà mu màyi. Bàdi ne dibàtiiza dyà

mu nyumà, mùdibo badibiikila amu, mùzàbì awu. Bàdi ne bintu byònsò ànu bitèeka mu bulongàme.

110 Ki mùvwà Eliyà. Kàdi pààkapwekaye ku Yadène, bwà kukungamangana ne badyúdi abu, wakeela lubila munyi? “Nzambi wa Eliyà údi penyi?” Kacivwa muzàbì wa Eliyà wùvwà mucyènzè to. Cìvwa m’Bukolè bwà Nzambi wa Eliyà, bùvwà bucyènzè abu.

111 Nènku cintu cìdì bàà pa buloba bàkèngela mu dindà emu m’Bukolè bwà Nzambi wa Eliyà. Udi mufwànyine kwikala mwakùle mu myakulu ne mwelè mbilà, ne munyeemàkàne mu cibambalu mwònsò emu. Kàdi cìdì citùkèngelà m’Bukolè bwà Nzambi wa Mpenta, bwà kupàtula myoyi ne bintu bivwà mu nsòmbelu mu ditùkù adi abi, mu bukolè bwà bàpostòlò.

112 Mùzàbì mumukombwela wùvwà ànu mwîmpè, kàdi bivwà bimukèngela dibìikila dipyadipyà mu mwoyi wèndè dyà kùdì Nzambi. Bivwà bimukèngela dilaabiibwa dipyadipyà dyà kùdì Nzambi. Úvwa muvwàle mùzàbì mumukombwela pààkalwàye ku musùlù apu, kàdi bivwà bimukèngela dibìikila dipyadipyà dimupèèsha dyà mbedyambèdì dyà kùdì Nzambi, ne Bukolè bumupèèsha bwà mbedyambèdì bwà kùdì Nzambi, bwà kwenza cishimà aci.

113 Nènku, mwanèètù, kuciinyikù bwà kulomba Nzambi cintu kanà cyònsò to. Udi ne cyà kulòmba Nzambi, anyi kulòmba kùdì Nzambi, cintu kanà cyònsò cìdìYe mulayè. Bwalu, mèmè ndeeja Nzambi udi wa bukolè ne wa ngulu yònsò, ne piikalàbi ne ndi musadidi wa Nzambi, ndi ne cyà kwenza byenzedi byà Nzambi. Ne mèmè ngenza byenzedi byà Nzambi, ndi ne cyà kulòmba Nzambi bwà àfikishè bintu ebi ku dyenzeka, bwalu Yèyè ùdì ùndòmba mèmè bwà kwenza cìdì kaciyi mwà kwenzeka. Bikèngela mMulòmbè. Bikèngela mMusòkè, ne ngiimanè mwaba awu ngàmbe ne: “Nzambi, Wèwè ngwàkacilaya.” Ki munùdi pèènu ne cyà kwenza, muntu yònsò.

114 “Nenùpetè bukolè,” Byenzedi 1.8, “paanyimà pàà Nyumà Mwîmpè mumanè kulwa pambidi pèènu.” Paanyimà pàà Nyumà Mwîmpè mumanè kulwa pambidi pèèbè! Paanyimà pàà wèwè mumanè kuvwàdikiibwa mùzàbì bu mwena Kilistò, paanyimà pàà diitabuujja dyèbè dimanè kushikama mu Kilistò, dìbà adi neùpetè bukolè. Ki bwalu mbwòbù abu’s. Èyowà.

115 Nènku, mwanèètù wa balùmè, mwanèètù wa bakàji, yònsò wa kunùdì, mu dindà emu, swàyikù ngàmbe bwalu ebu kumpàlà kwà kusambidila babèèdì, swàyikù ngàmbe nùnku: Ku dikwàcisha dyà Nzambi, nwànsambidilaayikù. Ànu mùmvwà mwimàne, kùkaadi bidimu dikùmi, pa cibùmbà cyà ku cyambilu eci, nyiisha pa Davìdì ne Goliyààtà, mpindyewu kí n’Goliyààtà udi uncyàmakana to, Nzambi ùkaadi mumanè kumushipa kumpàlà kwànyi, kàdi cintu cìdì cincyàmakanà, ndipangila dyà

diitabuuja, dipangila dyà cintu kampànda cîmvwà mumanyè ne cívwa pabwípí apa.

116 Nènku mu dindà emu, kumpàlà kwà tabernacle mukesè ewu cyàkàbìdì, ndi ngeela lubilà lukolè ne: Nzambi wákafila mulayi ewu awu ùdi penyi? Nzambi wákatwilangana naanyi ne cyôci eci kuntu kwaka awu, udi penyi? Semènà kumpàla eku, Nzambi, umpèèshèku bukitù. Mpèèshèku dikàndà. Mpèèshèku meeji mapàngadika, nànsha bibànde nànsha bipwekè. Nànsha kwôkò kùmweka mîdimà, anyi kùmweka . . . Nànsha cyôci ne mmwènekeli kaayi, tûngunukà. Mulayi mmulelèlà.

117 Nènku mwanèètù wa balùmè, mwanèètù wa bakàji, dimwè dyà ku matùkù àà . . . Bwènù nwènù balundà bàanyi bangènzàmpèkààtù bàdi kaaba aka mu dindà emu aba, ne nwènù bàdi bàteeta kutentula bwena Kilistò, udi mwà kwikala wa mu èkèleeziyà, abi mbîmpè be, ncyèna ne bwalu bubì bwà kwamba pa bwalu to, ncyèna cilumbù nànsha cikesè ne dilonga dyènù dipilùkè dyà túlaasà, anyi ne tèdòlòji wenù awu to, Ncyèna naabi cilumbù to, kàdi, kaa, Nzambi awu ùdi penyi?

118 Kàvwa ng'Elìyà to, twamb'eku twamb'eku. Kàvwa ng'Elìyà wákakòsolola musùlù awu to. Kacívwa mmùzàbì wèndè awu to. Elishà wákawùmusha ku dikaaya dyèndè. Wákawùvùnga mùshindù ànu wùmweùmwe wákawùvùngà Elìyà awu. Kàdi pàakabangàye bwà kuteeta bwà kuwùkùpa eku ne eku, kamùvwa Bukolè nànsha bukesè to. Pashiishe kwelayè lubilà, mumanyè ne Nzambi ùvwakù mwaba kampànda ne: “Nzambi awu ùdi penyi? Ùdi penyi?” Dìbà adi cintu kampànda cívwa ne cyà kwikala cilengè mupròfeta awu, bwalu wákakùpulula mùzàbì awu ne kuwùtuuta pa màyi, ne kukàngukawù dyàmùnu too ne dyàmwàmwa. Nènku mwísù mwà balombodi bàà èkèleeziyà bàà ditùkù adi abu, mwísù mwà badyudi bàà ditùkù adi abu, yèyè kusabuka Yadène wènda wènda, ànu mùvwà Elìyà mwenzè kumpàlà kwèndè amu.

119 Kabyèna bitùkèngèla malongesha to; awu tudi naawù. Kàdi bìdi bitùkèngèla Nzambi wa Elìyà. Bìdi bitùkèngèla Bukolè bwà Nzambi wa Elìyà, bwalùkile mu èkèleeziyà wetù. Bukolè bwà kucifikisha ku dikwàta mwaba awu, ne kubìikila Dìyì dyà Nzambi ne: “Ndyà bushùwà,” nànsha byà munyi.

120 Nènku, bantu bônso kaaba aka mu dindà emu, twètù bu bantu, tudi mu njila batàngìle ku Yadènè. “Nènku pàakafikàye ku Yadènè.” Neùkakùfikè, dimwè dyà ku maadindà aa anyi dimwè dyà ku malòòlò aa.

121 Pàakafikàye ku Yadènè, ùvwa wènda bu mucimunyi. Kàdi, pàakafikàye ku Yadènè, ki cívwa dishiilangana ncyôci aci. Ùvwa muvwàle mùzàbì mumukombwela. Muntu mukwàbò ùvwa muwùvwàle. Kàdi wùvwa mùzàbì mwîmpè, ne yèyè ùvwa mumanyè cívwa muntu uvwa muvwàle mùzàbì awu awu.

122 Mwanèètù wa balùmè, mwanèètù wa bakàjì, dimwè dyà ku maadindà àdi pànshi aa, nebiKèngelè bwà mèmè kupweka ku Yadènè.

123 Mvwa ngeela meeji. Mu mapingaja emu, netùye kwà Mwanèètù wa balùmè ne Mwanèètù wa bakàjì Wright. Kanùbàpu mwoyi to. Eci mmufikilu wà ngòlò wà dibàkà dyabò. Ngeela meeji, èkèleeziyà, nebiikalè mwà kwenza naabò di—didyà dyà mundaamuunyà. Mvwa ndyàmbidila, dīngà ditùkù ne: bidimu makùmi àtaanu! Kàbìdi ndi mbàmòna bònso bàbìdi, beelè bidimu ne bakòòkè. Mèmè kudyàmbidila ne: “Èyo, nkàadi ne bidimu makùmi ànaayi ne mwandamutekète.” Bàvwa basèlàngàne ànu bidimu bisàtù cyanàànà kumpàla kwà mèmè kulediibwa.

124 Makùmi ànaayi ne mwandamutekète! Ndi ngenda nya mutàngile ku Yadènè. Bikèngela mpwèkeku. Bikèngela nkakùfikè. Mèmè nènkaKùfikè. Ncifwànyine kwenzekela ku njìwù yà mu njila. Ndi mwà kukùlukila mu lupeepèlè, mu ndèkè. Ndi mwà kwashiibwa cingoma, ne mukete wà dyabùlù mu mwaba kampànda, ngumba mfwà. Ncyèna mumanyè mungààyà to. Kàdi, kùdi cintu cìmwèpelè cīndiku mumanyè, nyààya, ne ndi ngenda nya mutàngile ku Yadènè.

125 Kàdi pàngààfikàku, ndi muswè kumanya cintu cìmwèpelè, ncyà ne ndi pàànyì muvwàlè mùzàbì munkombwela, mèmè ewu. Ncyèna ngeeyemena wànyì mèmè nànsha, bwalu kī mmwìmpè to. Bwalu, Eliyà mmwenzè ànu wàmbula mùzàbì wà Elishà awu, kupandayè wèndè awu tupese tupese è kutwimanshayè panshì. Nènku ki mùshindù wàkadìbì pàngààkapetà Kilistò. Mèmè kudipanda mèmè mwinè, mmwènenu yànyì sungasunga, lukutukutu lwànyì sungasunga, kantu kàànyì kakesè kàà lukutukutu aku. Mèmè kudyàmbidila, pāmvwà muyiishi mutekète, wa ba-Baptistes, mvwa ànu bu mùdi... Mvwa muntu kampànda. Kàdi, mèmè kucipanda; mèmè kuvwàla muzàbì Wèndè Yèyè. Nènku pàngààfikà ku Yadènè, ndi muswè kudisangana mujingila mu mùzàbì Wèndè Yèyè. Yèyè neàlonda aci. Nènku netùkùfikè dīngà ditùkù.

Kàdi twànji túsambilàayikù katanci cyanàànà.

126 Taatù wa mu Dyulu, patùdi mu lwendu lwètù lwà tuya ku Yadènè mu dindà emu apa, bu bacimunyi, ne dīngà ditùkù, tudi ne cyà kuleeja cintu kampànda kùdi Yadènè, mbwena kwamba ne, kùdi lufù. Nènku, kaa, cintu kaayì cyà cìkwàcisha bwòwà cīikalàci’s wè, ditàpuluka ne Nzambi. Katwèna mwà kusabuka to. To. Kàdi, Eliyà, pàakafikàye kuntwaku, ùvwa muvwàlè mùzàbì wà Elishà... mùzàbì wà Eliyà. Kàdi pàakakòpolàye mùzàbì awu... wà Eliyà awu, muntu uvwa usànkisha bikolè ku dimònà Dyèbè awu, ne Wèwè wàkamwitaba ne kumufikisha mu Dyulu pāmwe Neebè. Ne Elishà ùvwa muvwàlè mùzàbì wèndè, pa nànkù yèyè wàkaleeja kùdi Yadènè, lufù, mùzàbì wà

Eliyà awu. Ne wôwò wàkiitabiibwa, ne Yadènè wàkakànguka, è kusabukayè.

¹²⁷ Nzambi munanga, dîngà ditùkù, nebikèngelè bwà tùpwekè. Katwèna mwà kuleeja byenzedi byètù bîmpè to; katwèna naabi nànsha. Katwèna mwà kuleeja cintu nànsha cîmwè pa buloba to. Ncyèna mene njinga cintu nànsha cîmwè to, bwà kuteeta bwà kuleeja, kàdi ndi ngeeyemena mu kaabujimà dikùmbanyina dyà Yesù. Wèwè wàkaMwitabà, ne kuMubiisha ku bafwè, ne Yèyè wàkabwejiibwa mu Bwikadi bwà Nzambi ne neàsombelèmu kashidi. Nènku, Nzambi, ndi muswè kuKuleeja cyôci aci ne, ndi muMwitabùje, ne ndi muMunangè. Nènku, ku ngâsà Wendè, Yèyè mmutùvwàdike mùzàbì Wèndè. Nènku ndi ndòmba, Taatù, bwà Watùkwàcishakù mpindyewu mu matùkù a mvità. Nènku mwaba wùdi bantu bàà Nzambi ne cyà kwenza byenzedi byà Nzambi, Ndi ndòmba bwà Ûtùlekèlèku twàngatè mùzàbì wà Kilistò, bukolè bwà Nyumà Mwîmpè, ne kubiikila Nzambi uvwa musòmbèle munda Mwèndè awu. Enzàku nànkù. Mu Dîna dyà Kilistò mmutùdi tulòmba nùnkù emu.

¹²⁸ Nènku patùcìdi ne mitù yètù miinyika apa. Ndi ànu ndikonka, mwaba ewu mu dîndà emu ne, kwòkò muntu udi uteeta kupweka mutàngile ku Yadènè, kàyi muvwàle mùzàbì ewu to. Kwòkò muntu kàyi muvwàle mùzàbì wà Yesù Kilistò, kàdi nànsha mwàkavwàdiibwawù musangu kampànda kùdi Mwànà wa Nzambi. Ndi ndikònka, ní kwèna muwùvwàle mu dîndà emu, ni udikù mwà kwela byanza byèbè muulu kùdi Nzambi ne kwamba ne: “Nzambi munanga, pa dîbà edi, ndi mpindyewu muswè kuwitaba.”

¹²⁹ Nzambi àkubènèshè, inábànza. Muntu mukwàbò ùdikù mufwànyine kwela cyanza muulu anyi? Nzambi àkubènèshè, mwanàanyi wa balùmè. Muntu mukwàbò, ùdikù ànu mwà kwela cyanza muulu anyi? Nzambi àkubènèshè, wèwè mwànà mukèsè wa balùmè awu. Nzambi àkubènèshè, wèwè nsongàalùmè. Muntu mukwàbò mmufwànyinekù kwela cyanza muulu anyi? Nzambi àkubènèshè, lwà paanyimà apu, mukalenge.

¹³⁰ Cyàmbè ànu ne: “Ku dikwàcisha dyà Nzambi, mu dîndà emu, ndi muswè kulekela bwakànè bwànyì sungasunga, mmwènu yànyì sungasunga ayi, ne meeji àànyì à bisànkasanka ne dicyònkómoka awu, ne mpèkaatù ùndi musòmbèlemù awu. Nènku ndi muswè bwà Kilistò àmvwàdikèku mùzàbì Wèndè, mu dîndà emu, bwà ngaakwàtakù mudimu ne mùzàbì Wèndè awu. Ndi mumanyè ne Wôwò awu ki mupwàngànè wùdiku.” Nzambi àkubènèshè, mwanàanyi wa balùmè. Muntu mukwàbò àmbèku ne: “Nènku nèngèlè ànu muulu . . .”

¹³¹ Elà cyanza cyèbè muulu, wamba ne: “Ndi mpindyewu muswè kwitaba Nyumà Mwîmpè mu nsòmbelu wanyì. Ndi muswè ngiikalè muvwàdika mùzàbì wà bwakànè Bwèndè awu. Pàngààfikàku ditùkù adi, ncyàkudileeja mémè mwine

ngàmbe ne: ‘Èè, mpindyewu, s’Udi mumanyè ne mémè ewu ngâkasumbilakù muntu kampànda makàla. Nkààdikù mwenzè cikampànda.’” Abi mbilenga, abi mbilenga be, kàdi abi. . . Bivwa bikèngela bwà cintu kampànda kufwàci, bwà wèwè kwikala ne mwoyi, ne ànu ku cyenzi cyà cyôci aci nkûdi wèwè mwà kusungidiibwa. Udikù mwà kwela cyanza muulu anyi? Ambà ne: “Kilistò, ndi mpindyewu ndekela njila wanyi sungasunga. Ndi ngiitaba njila Webè Wèwè. Ndi muswè bwà Wângenzèlakù luse pângààfikà ku ndekeelu kwà njila apa?” Èyo. Nzambi àkubèneshè, inàbànza. Nzambi àkubèneshè. Èyo.

Mpindyewu netwènzè disambila.

¹³² Mpindyewu, Taatù Mwakàne, wa mu Dyulu, byanza bitwè ku mwandamutekète, mwandamukùlù, anyi dikùmi mbyela muulu. Ncyèna mumanyè mùdibo to. Wèwè ngudi mumanyè byònsò bìdi bìbàtàngilà. Mémè ncyèna mumanyè to. Kàdi nyewù bàdi ne lukèngelu leelù ewu. Nènku mbamanyè ne bàdi mu lukèngelu, ne bàjinga kulwa bwà kwitaba dikwàcisha mu cikondo cyà lutàtu; pa kumòna ne, cikondo cinènè cikaadi pabwîpi mpindyewu, bômbè yà mushindà, bintu binènè bìdi bitwindile.

¹³³ Nènku ndi ndòmba, Taatù wa mu Dyulu, bwà Ûbèneshèkù bantu aba, ne leelù ewu ùbàtentèkèlèku cyanza Cyèbè ne ùmushèku bubì bwàbò bwònsò ne mpatà. Nènku swàku bwà biimanshè kule mùzàbì wàbò wà bwakànè bwàbò sungasunga mudyà kùdi mbùmà awu, mùdi mikùmbi yà yelèkè, ne mbùmà yà diitabuuja dyà biitabàatàbà ne cyena-èkèleeziyà, bimudyè bitùbùle masòsò masòsò, kàdi (byôbi) kàbyàkushàalakù kàbìdì to. Swàku bwà bàmwimànshè kule, ne bòòlolè cyanza bàngatè mùzàbì wà Mukalenge Yesù. Bámbe ne: “Ndi muMweyèmène Yèyè. Ndi mudijingile, kí mmu bwakànè bwànyì mémè to, anyi pa meeji àànyì sungasunga to. Kàdi, kubangila ànu pa dîbà edi, ndi nKweyemena Wèwè.” Enzàku bwà bàcipetè, Taatù, bwalu tudi tulòmba nùnkù mu Dîna dyà Kilistò. Amen.



MÛZÀBÌ MUKOMBWELANGANA LUA56-1125M
(A Secondhanded Robe)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dindà, mu matùkù 25 à ngondo wa dikumi ne umwe, cidimu cyà 1956, ku Branham Tabernacle mu Jeffersonville, Indiana, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org